

Ñiic 67

1. Ræi kakä Gæ-thi-mani, ci Yecu jæ tök kæ pal, kä kæ šoo ci lœcdæ jiath æ lõñ. Kä æ ñu ci Yecu lœcdæ jiath æ lõñ œ?
-Kæ šoo Yecu ñäcæ jæ i bi cuœcdæ bæ la cuœc mi /kèn met tuœœk.
2. Æ ña ænëë bòòth buàn nath kæ muti kænæ kæti mœ?
-Æ Ju-dæth.
3. Æ ña mi bòòth Ju-dæth kæ šoo ba Yecu ben kâp?
-Æ Ciæ-tan.
4. Ci Ciæ-tan ñaani nyœk kæ both bä?
-Ci Ciæ-tan næi diaal tëë lõkæ lieñ Ruac Kuœth bòth.
5. Kä æ ñu cu jààk Yecu ro bar œ?
-Ci jààk dual kä ci kæn æ kui ni guààth æ ñu ca Yecu kâp œ.
6. Æ ñu mi ci jààk æ kui ni guààth œ?
-Min ci jààk æ kui ni guààth æ šoo bi Yecu la Kään idi mi ca jæ kâp kä ba wä näk.
7. Kä næi tëë ca Yecu kâp cuœ jæ nañ ni æ kæn?
-Kä næi tëë ca Yecu kâp cuœ jæ nõñ nhiam kuàr palä min diit.
8. Kä æ ñu /kèn bòòth Ji Juudh duer met jiek kä Yecu mœ?
-Kæ šoo Yecu /thilæ mi jiääk mi cæ làt.
-Kæ šoo Yecu /thilæ duer mi cæ làt.
9. Mëë ci bòòth palä min diit ruac kæ Yecu kä thiecæ Jæ mi æ Jæn Keritho, min la Gat Kuœth, cu Yecu jæ lõc idi?

-Cu Yecu jæ löc i, “Æ šän.” Kä bia Gat Ran næn nyuuræ tetä Cueec bumä kä bæ piny cãñ nhial kæ ræi puàari.”

10. Kä æ ñu ci kuäär palä min diit jæ lar i ba Yecu dhil näk œ?

-Ci kuäär palä jæ lar i ci Yecu Kuoth kuæth.

11. Ci Yecu Kuoth ben kuæth?

-Šèth.

-Kä kæ koer kä mää ci kuäär palä min diit kænæ bòòth Ji Juudh Yecu kuæth lith, cu Kænæ nõñ Pay-læt.

Kuænæ Mak 15:1

1-Ni kæ run-wañ æ lõñ, cu kuär palä, kænæ dit, kænæ ñieec ñuoetni æ mäni koem Thin-æd-rin, kæliw ruac guœk guäth kæ. Kä cu kæn Yecu yian, kä cuœ jæ wä kàm Pay-læt.

-Æn Pay-læt æ ña?

-Pay-læt æ kuäär kä Ju-diæ-yæ mi ca kuany æ Thii-thær, min la Kuäär Ji Rom in diit.

-Kä kæ šoo ba Yecu näk, bikæ riet kœñ dhil jiek kä Pay-læt.

-Mää ca Yecu nõñ nhiam Pay-læt, cu Pay-læt Yecu thiec kæ thiec.

Kuænæ Mak 15:2

2-“Æ jin kuäär Ji Juudh in diit?” cu Pay-læt æ thiec. “Juä, æ jæn cet kæ min ci lar,” cu Yecu jæ löc inœ.

-Kä æ ñu ci Yecu jæ lar œ i Æ jæn kuäär Ji Juudh in diit œ?

-Kæ šoo Yecu æ raan thuøk dueel Kuàr in diit ni De-bid.

Kuænæ Mak 15:3-5

3-Cu kuäär palä jæ kuyth luøk kæ ti ñuan.

4-Kä cu Pay-læt æ nyøk kæ thiec, “/Thilæ mi bi löc nun? Guicæ ca ji goeany kæ ti nyin ñuan.”

5-Ci Yecu ñöt kæ mi /thilæ mi lööcæ, æ bi Pay-læt gày ælõñ.

-Kæ šoo ca Yecu goeany æ naath kæ kac, cu Yecu ñöt kæ mi bitæ kä /cæ kæ löc.

-Cet kæ mëë ci gòøk æ lar ni mëë i, bi Kään biæt kæ šoo ba jæ nañ luøem kæ kac.

-Kä kæ nin Cän Bälä, Pay-læt la lunyæ Ji Juudh ram kæl yiëenä mi cu la ñut kä kæ.

-Kæ kui æ mœ, cu Pay-læt Ji Juudh thiec mi dëræ kæ luøeny Yecu.

Kuænæ Mak 15:6-11

6-Tämæ kæ ciañ ñuøetni tÿthkä löaac la luøeny kæ rami ca nhøk i ba löny æ naath kæ cän tæth kä löaac.

7-Tæ kæ wut mi cœali Ba-ra-bæth mi ca yiæn kæ kui näkdæ kæ naath æ lõñ ræi kòori ti ñuan.

8-Kä cu buàn ben nhial nhiam Pay-læt kæ šoo ba jæ thiec kæ min la lätæ kä kæ ni ciañ kæ cän tæth kä löaac.

9-“Goræ jæ i bä yiæ luøeny kuäär Ji Juudh in diit?” Cu Pay-læt kæ thiec,

10-kæ šoo cæ jæ ñàc i Yecu nyier kæ jæ bañ kæ kui æ mœ ci kuäär palä min diit jæ nooñ kæ gòony nhiamdæ mœ.

11-Kä cu kuäär palä naath cuøem šoo ba Ba-ra-bæth luøeny guäth Yecu.

-Ci Pay-læt æ ñàc i Yecu /thilæ mi jiäk mi cæ làt.

-Ci Pay-læt æ ñàc æn šoo bòòth Ji Juudh ca Yecu káp kæ šoo tièl kæ ni jæ bañ.

-Kæ kui æmœ, Pay-læt gòræ jæ i bi Ji Juudh mÿk ni Yecu kæ šoo de jæ lõny.

-Kä kæ šoo nœ, cu kuäär palä min diit naath cuøem Šoo ba lõny ni Ba-ra-bæth, min la nääk nath, /ci mœ Yecu.

-Kä cu Pay-læt Ji Juudh thiec kæ thiec.

Kuænæ Mak 15:12-14

12-“Kä æ ñu mi bä læl, kæ ramin cia coel i kuäär Ji Juudh in diit?” cu Pay-læt kæ thiec inœ.

13-“Puàtæ jæ jiaath!” cu kæ wak kæ jœw mi diit.

14-“Kä æ ñu? Æ duer ñu mi cæ làt?” ci Pay-læt kæ thiec. Kä cu kæn ñöt kæ mi roeal kæ æ lõñ i, “Puàtæ Jæ jiààth!”

-Kä kæ šoo Yecu /thilæ mi jiääk mi cæ làt, cu buàn nath Yecu nyier bañ kä gòr kæn Yecu kæ šoo ba jæ näk.

-Cet kæ mëë ca lar æ gòk ni wal i, ba Kään nyier bañ.

-Ci buàn æ gòr i ba Yecu Puàt jiaath.

-Kä puœt jiaath æ ñu?

-Æ puœt ran wii jiaath kæ thoti tetni kænæ ciokæ, kä ba jæ cu bàny wii jiaath æ mäni mi cæ liu.

-Puœt jiaath æ kæl kä tin byc kä Ji Rom kæ šoo näk kæn ni raami ci naath cuc kæ jiääk kæ jæ.

-Kä cu Pay-læt Yecu jakä i ba duäc.

Kuænæ Mak 15:15

15-Kä kæ šoo bæ lòc nath jakä tæth cuæ kæ luœny Ba-ra-bæth. Kä cuœ Yecu duäc, kä cuæ jæ kàmkae šoo ba jæ wä puàt jiaath.

-Mi duääc Ji Rom raan, la làt kæ waat mi te kæ kar ti ñuan ti ca yien kä cœw kiæ yieethni ti mucœth-mucœœth.

-Mi duääc Ji Rom raan, la thiän jiookiaen kæ buœœt kä kæ thään guàthni næi ti cet kæ toetœ la liukæ kæ ñœàth buœœtœni.

-Kä kær kær kä mää ca Yecu duäc, cu lathkeeri Jæ buy.

Kuænæ Mak 15:16-20

16-Cu lathkeeri Yecu both ræi luaak kä cuœ buàn lathkeeri mi diit wä duœl guäth kæl.

17-Cu kæn biy mi mää lath puœœnydæ, kä cuœ thac kuiini tak kä lathkæ jæ wiidæ.

18-Kä cu kæn æ tök kær mi cœœl kænæ, “Mali, lo kuäär Ji Juudh in diit!”

19-Kä la luœc kær ni duäcdæ kær tañ wiidæ kä ñuœl kær jæ kä ruæy. Kä guœñ kær ro dhiamdæ muàali, kær riakæ jæ.

20-Kær kær kä mää ci kæn thuœk kær mi riakæ jæ, cu kæn biy in mää eë ca lath puœœnydæ wœc kä cuœ bièènykæ tin wen lath puœœnydæ. Kä cuœ jæ cu both raar kær šoo ba jæ wä puàt jiäth.

-Kä cu lathkeeri Yecu duäc kä ñuœl kær Jæ kä ruæc.

-Cet kær mää ci Kuoth æ lar kær gòk ni wal, ba Kään duäc kä ñuœl kær Jæ kä ruæc.

-Kær šoo naath luœthkæ kuàr tin dit kær kãm ro muàali nhiamdiæn, ci lathkeeri Yecu göñ kær šoo bikæ jæ buy æ /ci mœ luth.

-Kä kær šoo kuàr tin dit la lath kær biyini ti màli, inœ bã cu lathkeeri Yecu buy kær lath biy mi mää puœœnydæ.

-Kä kær šoo kuàr tin dit la lath kær kumni kuäärä wuœthnikæen, cu lathkeeri Yecu buy kær lath kum kuiini wiidæ.

-Cet kær mää ca lar æ Kuoth ni wal kær duœœp gookni, ba Kään buy.

-Æn kum kuiini æ nyuuth kær kui ñukä?

-Æn kum kuiini æ nyuuth kær kui kuethä Kuœth.

-Mää ci A-dœm kænæ Yip duer, ci Kuoth wic muœœen lam kær šoo bæ dònny kær kuii.

-Mää ci lathkeeri kum kuiini lath wii Yecu, æ nyuuth kær kui ñukä?

-Æ nyuuth mi löt ni šoo bi Yecu lām Kuœth nañ kæ puœnydæ.

Kuæenæ Mak 15:21-22

21-Tæ kæ wut mi bèè kä Thi-ri-næ, mi cœali Thay-mœn, min la guàn Æ-læk-dhæn-dær kænæ Ru-puth, mi jæl kæ duœœep kæ wädæ ræi cieñ, cu kænæ kuœk šoo bæ jiaath Yecu kap.

22-Kä cu kæn Yecu nañ guäth mi cœali Gòl-gò-tha (min löt ni šoo guàath poorä).

-Kä cu lathkeeri Yecu both wii pààm mi cœali Gòl-gò-tha mi te joew rÿyk kä Jæ-ru-thæ-læm kæ šoo ba jæ wä puàt jiaath.

-Æn wii pààm æn wani, cu lathkeeri jiaath ñàp làth piny, kä cuœ Yecu làth wiidæ kæ šoo ba jæ puàth joew jiaath.

-Kä æn wanœ, cu lathkeeri Yecu puàt tetni kænæ ciokæ wii jiaath in gæær kæ thot-thootni.

-Cet kæ mēë ci Kuoth æ lar ni mēë kæ thuuk gòøkni, ba Kään dhil puàt tetni kænæ ciokæ wii jiaath in gæær.

-Kä mēë ci lathkeeri thuœk, cu kæn jiaath cuñ æ ca Yecu puàth thin kæ thot-thootni.

-Tiimi min ci Yecu jæ lår Ni-go-di-mœth?

-Ci yecu jæ lar cet kæ mēë ci Mu-thæth thoel kap nhial wii jiaath kæ šoo bi naath kään kæ jæ, inœ bã ba Kään dhil kap nhial bã kæ šoo bi naath kään kæ jæ.

Kuæenæ Mak 15:23-24

23-Kä cu kænæ kàm pi ti kæc ti ca licem kæ wäl ma-ra, kä cuœ màthdæ lòk.

24-Kä cu kænæ puàt jiaath. Kä cu kæn bièèynikæ dàak kamnikiaen, kæ šoo ci kæn kæ dàak kæ ñar màr-màari kæ šoo bi kænæ cu ñàc æ ña mi bi wä kæ bañdæ mœ.

-Cu thàañ mään ben kä muœckæ Yecu pi ti kÿc-kÿyc ti ca licem kæ wäl ma-ra.

-Kä cu lathkeeri tēë ca Yecu puàt wii jiaath bièèyni Yecu dàak kamnikiaen kæ màr-màari.

-Cet kæ mēë ca lar æ Kuoth ni mēë kæ thuuk gòøkni, bi kæn Kään bièèynikæ dàak kæ màr-mär.

Kuæenæ Mak 15:25-27

25-Cuæ la thaak dioek ni mēe ca ku thuñ puàt jiaath.

26-Kä upat min ca kuæth ni jæ luœk ca jæ goer i: KUÄÄR JI JUUDH IN DÌT.

27-Kä cuœ màac nath dàñ ræw puàt kæ jæ kææl, kæl pèe cueecdæ kä min doẽñ pèe caamdæ.

-Kä niæ wancœ cuœ wuni dàñ ræw puàt kææl kæ Yecu, tè kæl cueecdæ kä te min doẽñ caamdæ.

-Kä kæn kæ næi ti jiäk.

-Cet kæ mēe ca lar æ Kuoth ni mēe kæ duœœp gòkni, ba Kään näk kæ næi ti jiäk kææl.

Kuæenæ Mak 15:29-32

29-Kä næi tēe Jäl kæ jæn duœœp æ mœ cu kæn æ buy kä kueth kæ jæ, kä tiñ kæn wuœthkiæn kä lar kæ jæ i, Šœœen! Æ jin
ēe bi luak Kuœth däk kä bi jæ nyœk kæ tàth kæ nin dioek,

30-ber piny wi jiaath kä kæn rœœedu!”

31-Kä cu kuàr palä kænæ ñieec ñuœtni jæ buy kàmnikiaen. “Cuæ næi ti ñuan kæn,” cukæ wèe inœ, “kä /cæ rœ luän i deræ rœ
kæn!

32-Æn Keritho æ mæ, min la Kuäär Gan lth-ryl in diit, æ jæ bæk piny wii jiaath kæ šoo bakœ jæ cu ñäth.” Kä næi tēe ca puàt
jiaath kæ jæ kææl bä cu kæn æ buy bä.

-Ci Yecu jæ lar mi ci Ji Juudh luak Kuœth däk, bi Yecu jæ nyœk kæ tàth kæ koer nini dioek.

-Æn Yecu lötæ ni luak Kuœth ēe ca tàth æ Ji Juudh rææk kä Jæ-ru-thæ-læm?

-Šèth.

-Kä æ luak indiaen ruac Yecu kæ kuidæ mœ?

-Yecu ruac ni jæn kæ kui puàànydæ.

-Yecu latae ni šoo cän mi bi Ji Juudh puœnydæ däk kæ puœtdæ wi jiaath, Bæ rœ nyœk kæ jiec lith kæ koer nini dioek.

Kuænæ Mak 15:33

33-Kä thaak bækæl cu muuth ben wii muœœen kæliw cuæ mäni thaak dioek.

-Kä æ ñu cuæ tè kæ muuth wii muœœen kæliw kæ thaakni dioek œ?

-Kä thaakni mucœth dàñ dioek toetœ æ nyuuth.

-Kä æ nyuuth indiæn kä muuth in ci tè thin wii muœœen kæliw kæ thaakni dàñ dioek toe?

-Ci Guandan ni Kuoth Yecu bàny piny wii jiaath.

Kuænæ Mak 15:34

34-Kä kæ thaak dioek cu Yecu wak kæ jœw mi diit, “Ælui, Ælui, la-ma tha-bak-tæni?” Min löt ni šoo, Kuothdä, Kuothdä, æ ñu ci šä päloe?”

-Kä mœë ci Kuoth Yecu bàny piny wii jiaath in gæær, cu Yecu wak kæ jœw mi diit.

-Kä æ ñu ci Guàn ni Kuoth Yecu bàny piny œ?

-Ci Yecu mi jiäak làt?

-Šèth.

-Kä æ ñu ci Guàn ni Kuoth Yecu bàny piny œ?

-Guàn ni Kuoth duäacæ ni Yecu kæ kui duèèriku, kæ duèèrkä, æ mäni duèèr nææni diaal wii muœœen.

-Kä kæ šoo Guàn ni Kuoth duäacæ ni Yecu kæ kui duèèrikoen, kä kæ šoo inœ ci Guàn ni Kuoth Yecu bàny wii jiaath kärœa.

-Ræi Kakä Æ-dyyn, æ ñu mi ci Kuoth æ lar i bi dhil tuœœek kä A-dœm kænæ Yip mi ci kæ dœw jiaath in ci Kuoth æ lar i cuœeræ cam

cam?

-Bikæ dhil liu.

-Kæ šoo ci A-dœm kænæ Yip duèr, ci kæn liu kæ nàndiæn kæ Kuoth.

-Æn tāmæ, ci Yecu nàn kä Guàn ni Kuoth.

Kuænæ Mak 15:35-36

35-Kä cu thàa nath ti tè cuñä jæ liñ latae mæmæ, cu kæ wèè, “Liæñæ jæ, cœœlæ ni Yi-lijæ.”

36-Kä cu wut kæl riñ, cuæ yith-puœny cuàth kœñä mi ci wac æ lõñ, cuæ jæ möc kæ tañ mi bäär, kä cuæ jæ làth thöö Yecu kæ šoo bæ jæ löt. Tāmæ, pälæ jæ tàädæ. Kuanæ jæ mer guicin kæ dœœ mi bi Yi-lijæ ben kæ šoo bæ jæ ben kàm piny nun.” cuæ wèè inœ.

-Næi tēē guæc kæ Yecu lith wii jiaath in gæær dhœñ kæn ni šoo cœl Yecu ni Yi-lijæ.

-Æn Yecu /cæ cœl ni Yi-lijæ.

-Yecu cœœlæ ni Guàn ni Kuoth.

-Kä æ ñu cœœl Yecu Guàn ni Kuoth œ?

-Kæ šoo ci Guàn ni Kuoth Yecu päl, cuæ la duäcä mi bÿc-bÿc æ lõñ.

-Ci Guàn ni Kuoth kænæ Yecu tè kææl kæ guààth mi nin di?

-Ni wal.

-Cuæ te kæ guààth mi ci Guàn ni Kuoth kænæ Yecu mer däk piny?

-Šèth.

-Kæ šoo mæmæ æ jæn jiol dääkä piny kam Guàn ni Kuoth kænæ Yecu kärœa, cu Yecu cu wak kæ jœw mi diit.

-Kæ šoo bi nàn kä Kuoth æ mi bÿc ni jæn æ lõñ wii muœœn æ mæ.

Kuænæ Mak 15:37

37-Kæ jœw mi diit, cu Yecu yiëedæ min jœak cu ñœš.

-Ci Yecu liu wi jiaath in gæær.

-Kä kœr kä mœë ci Yecu liu, æ ñu mi ci tœœk luaak Kuœth in diit?

Kuænæ Mak 15:38

38-Kä cu biy in dääk luak Kuœth rœ ræt ni däär ni nhial æ mäni pinydæ.

-Æn biy in tœ luaak Kuœth æ leeñu?

-Æn biy dääkæ ni duèl dàñ ræw ræi luaak palä mi diit.

-Æn biy dääkæ ni Duel in Šæl rœ kä Duel in Šæl rœœdæ æ lõñ.

-Æn biy æ nyuuth kæ kui kä ñu?

-Æn biy æ nyuuth mi nyööth ni šoo tœ raan kæ dääk kæ Kuoth.

-Kä æ ñu tœ raan kæ dääk kæenæ Kuoth œ?

-Kæ šoo tånæ kæ duèèr.

-Kä kæ šoo tånæ kæ duèèr, ci Kuoth kæenæ raan tœ kæ kam, kæ kui æ mœ /thilæ rami tœ luañ mi dœ cöth Duèèl in Šæl rœ æ lõñ æni kuäär palä min diit kä kææel kæ ruœn.

-Kä æ ña mi ci biy ræt ni nhial æ mäni piny œ?

-Æ Kuoth.

-Kä æ ñu ci Kuoth biy ræt ni däär œ?

-Ci Kuoth biy ræt däär kæ šoo nyöthæ ni jæ i /thilæ dääk mi bi læ ñöt thin kam ran kænæ Kuoth.

Kuænæ Mak 15:39

39-Mëë ci kuär rÿm, min tè cuñä nhiam Yecu, jœw Yecu liñ kænæ lià in liu kæ jæ næn, cuæ wèè, “Æ put wut æmæ æ Gat Kuœth!”

-Kä mëë ci kuär rÿm, lathkeeri ti kuœr, Yecu næn liuæ, cuæ jæ ñàc æn šoo Yecu æ Kuoth min la Kään.

Kuæn Mak 15:40-41

40-Cuæ tè kæ thàañ mään ti gui guäth mi nän. Tè ræidiæn kæ Meri raan Mag-da-læ, kænæ Meri man Je-mith in toet kænæ Jò-thæth, æ mäni Tha-lo-mi bä.

41-Kä Gÿ-læli cu män titi jæ guœœr kä la nõõñ kæn tin la gòøræ kä kæ. Æ mäni män kœkiæn ti bè kä Jæ-ru-thæ-læm ben bä.

-Kä män titi kæ kæn tèè ca Kuoth ñäth, kä ñàc kænæ i Yecu æ Kään.

Kuænæ Mak 15:42-46

42-Kæ šoo æ guààth in rial naath ro ikä (kæ šoo mæmæ, æ cudh càñ lœñä)

43-Jœ-thæp raan Ær-ma-thi-ya, æ raan matä dölä, kä jæn puœnydæ liibæ ni ciañ kuäärä Kuœth nhial, kä kæ buœm lœaac cuæ wä kä Pay-læt kæ šoo bæ riñ Yecu wä thiec kæ kuœnydæ.

44-Ci Pay-læt gàày mëë cæ jæ liñ i cæ liu kæ pÿth. Kä mëë cæ kuär rÿm cœl, cuæ jæ thiec mi ci Yecu dhil liu.

45-Mëë cæ thuœk ñàc kä kuär rÿm, cuæ riñdæ thöp Jœ-thæp.

46-Kä cu Jœ-thæp bièèyni kunyä wä kœk, kä cuœ puœnydæ wä kàm piny, kä cuœ jæ kuäth kæ bièèyni kunyä, kä cuœ jæ làth ræi kœkä mi ca guañ pààm. Kä cuœ päm mi diit rial thöø kœak kunyä.

-Kä Jœ-thæp raan Ær-ma-thi-ya æ wut mi riãñ kä ñääthæ jæ i Yecu æ Kään ni Kuoth.

-Kä kæ kœr kä mœë ci Yecu liu, cu Jœ-thæp wä kä Pay-læt kæ cuæ puœny Yecu thiec kæ ŝoo bæ jæ wä kòny.

-Kä cu Jœ-thæp puœny Yecu wä kòny ræi kœkã kunyädæ.

-Cet kæ mœë ci Kuoth æ lar kæ thuuk gòkni ni mœë i, ba Kään kòny kæ næi ti riãñ-riããñ kææel.